

22 JUL 1999

UMNO KELANTAN AKAN SOKONG PEMILIHAN CALON PILIHAN RAYA

KOTA BAHARU, 22 Julai (Bernama) -- Umno Kelantan akan menyokong sepenuhnya keputusan yang akan dibuat oleh Perdana Menteri Datuk Seri Dr Mahathir Mohamad berhubung pemilihan calon yang akan bertanding pada pilihan raya umum akan datang.

Pengerusi Badan Perhubungan Umno Kelantan Tengku Razaleigh Hamzah percaya keputusan yang akan dibuat oleh perdana menteri selaku Presiden Umno itu adalah setelah mengambil kira semua perkara.

"Kita ikut nasihat Perdana Menteri sebagai Presiden Umno, kita ikut disiplin parti, kalau tidak macam mana kita nak lawan musuh," katanya kepada pemberita di Lapangan Terbang Sultan Ismail Petra hari ini.

Semalam Dr Mahathir meminta agar anggota parti komponen Barisan Nasional (BN) tidak mempersoalkan pemilihan calon yang akan bertanding pada pilihan raya umum akan datang bagi memastikan kemenangan selesa bagi BN.

"Kita harap apabila keputusan telah dibuat semua akan terima, itulah sebab kita berjaya dalam pilihan raya yang sudah-sudah," kata Tengku Razaleigh, Ketua Umno Bahagian Gua Musang dan anggota Parlimen kawasan itu.

Beliau berkata apabila menerima keputusan pucuk pimpinan parti, anggota Umno mesti sebulat suara menyokong keputusan itu dan bekerja dalam satu pakatan yang mantap.

-- BERNAMA

BD NMO